

Ullut ataatsimiiffiusut aqqaneq arfersaneq pingajuat, tallimanngorneq 6. november 2009.

Immikkoortoq 61

Namminersorlutik Oqartussat sanaartornermut aningaasaliuttaagaasa kommuninut
ingerlatassanngorlugit tunniunneqannginnerini sanaartornermut inatsisit ataatsimoortut
naammassineqarsimanissaat atuutsinneqalersimanissaallu siunertaralugu sanaartornermut
inatsisisstatut siunnersuummik ataatsimoortumik saqqummiussinissaq siunertaralugu
Naalakkersuisut sulissuteqaqqullugit Inatsisartut aalajangiiffigisassaattut siunnersuut.

(Atassutip Inatsisartuni ilaasortaatitai: Finn Karlsen, Siverth K. Heilmann, Knud Kristiansen)
(Siullermeerner)

Ataatsimiinnermik aqutsisoq: Josef Motzfeldt, Inatsisartut Siulittaasuut, Inuit Ataqatigiit
Atassut sinnerlugu Finn Karlsen saqqummiissaaq.

Finn Karlsen (A)

Tassa Inatsisartut Siulittaasuata qulequataa atuareeramiuk, qulequataa atuassanngilara,
tunngavilersutaa aallartiinnassavara.

Piviusuovoq pisortat sanaartugassatut pilersaarutigisaat amerlavallaartut suliluunniit
aallartinneqaratik piffissaligaanngitsumik kinguartinneqartariaqartarnerat.
Aningaasaliissutissat amigaatigineqarnerat imaluunniit suliariumannittussarsiuussinermi
akisuallaartumik neqerooruteqartoqartarnera taamaattoqarneranut ilaatigut pissutaasarlutik.

Taamatuttaaq piviusuovoq pisortat sanaartortitaat aallartinneqareersut amerlavallaartut
ningaasaliissutaasut sipporlugit akeqalersarnerat, taamaammallu sanaartukkat pineqartut
naammassineqarsinnaaqqullugit immikkut aningasaliisoqarnissaanik Naalakkersuisut

qinnuteqartariaqartarnerat. Tamatumunnga ilaatigut pissutaasinjaavoq pisut ilaanni Naalakkersuisut missingersuusiornerminni annikippallaamik aningaasaliisoqarnissaanik siunniussaqartarsimanerat, taamaalillutillu Inatsisartut aningaasaliiffiginikkallaakkanut akuersissuteqartinneqartarnerat. Aamma pissutaasinjaavoq, sanaartornermut akisussaaffik amerlasuutigut (soorlu atuarfinnik sanaartorneq) Namminersorlutik Oqartussaniillunilu kommuniniittarmat, tassanilu illuatungeriit soqutigisaat imminut naapertuutinngitsoortarnerat.

Ilisimaneqartutut naatsorsuutigineqarpoq sanaartornermik ingerlatsineq ukiut aggersut ingerlanerini kommuninut akisussaaffigitinneqartussanngorlugu tunniunneqassasoq. Taamallu ingilluartitaaginnartoqarsinnaagunaruaroq, suliassarlu kommuninut tunniutiinnarlugu, naatsorsuutigalugulu kommunit akisussaaffigilerpassuk pisortat sanaartortitaannut atatillugu ajornartorsiutaasartut qaangiutissasut aammalu pilersaarusiortarnermi Naalakkersuiisoqarfinni ajornartorsiutaasartut immini qaangiutissasut.

Taamatut uninngaannarluni ajornartorsiutaasunillu aaqqiiniarani isumalluutiginnitqarsinnaanissaaa Atassummit arlaannaatigulluunniit peqataaffiginagulu akuersaassangnilarput. Namminersorlutik Oqartussat tungaanut aammalu kommunit tungaanut isumannaassallugu akisussaaffimmik kommuninut tunniussineq pissasoq piffissaqarluarluni, isumaliutigilluagaallunilu pilersaarusiortluarnermik aallaaveqartinneqarnissaa pisussaaffigaarput. Aaqquissuussinerimmi nutaat pilersaarusiortluagaanngikkaangata isumaliutigilluagaanngikkaangatalu minnerunngitsumillu innuttaasut peqataatinneqarnissaasa amigaatineqarnerata kingunerisaanik qanoq kingunerlussinnaatiginersut takusareerpagut.

Atassummit isumaqarluinnarpugut sanaartornermik ingerlatsinerup kommuninut tunniunneqannginnerani piareersarnermi makku naammassineqarsimasariaqartut:

- Sanaartornermik nakkutilliisut suliamik ilisimasaqarluartut Namminersorlutik Oqartussat ataanni pilersinneqassapput, taakku siunnersortaallutillu nakkutilliinermik suliaqartinneqassapput. Sanaartornermik nakkutilliitiat aamma sanaartornerup iluani akit nakkutigilluinnassavaat, taamaaliornikkut kvadratmeterimut akigitinneqartut aqunneqarsinnaanngitsumik aammalu nunatta aningaasaqarnerata nammassinnaanngisaanik qaffakkiartortarnerat pinaveersimatinniarneqassalluni.

- Kommunini sanaartornermut ingerlatanut ataatsimoortumik sinaakkutassaasumik sanaartornermut inatsiseqalissaaq. Taamaalilluni kommunit oqartussaaffimmik akisussaaffimmillu annertunerusumik tigusinissaannut aammalu sanaartornermut aningaasaliussanik aqtsilernissaannut sinaakkutassat aalajangersarneqareersimassammata, qulakkeerneqareersimassammallu kommunit suliassamik ingerlatsinissaannut inatsisitigut sakkussat tamatigoortut pigineqarnissaat. Tamatuma ilutigisaanik aamma sanaartornermik aqutsisutut inissisimanermi kommunalbestyrelsit akisussaaffisa aammalu tamatigoortussaatitaanerisa apeqquserneqarsinnaannginnissaa.
- Akisussaaffimmik tunniussinissamut sioqqullugu misissorneqareersimassaaq, Inatsisartut nunaminertanik atuisinnaanermut inatsisiliaat nutarterneqartariaqarnersut imaluunniit naleqqussarneqartariaqarnersut.
- Inatsisiornikkut qulakeerneqarsimassaaq kommunit sanaartornermut pilersaarusiortarnerat allaffissornikkut aammalu politikkikku suliat paasuminartuunissaat, taamaaliornikkut innuttaasut takulluarsinnaassammassuk aningaasat qanoq atorneqarnersut, taamatullu aalajangersasarnerit sabinngisamik annertunerpaamik ammatinneqassapput innuttaasullu aalajangiiniarneri peqataatinneqarnerat annertunerpaatinneqassaaq.
- Sanaartornermi ilisimasat atorluarneqarnerulernissaat anguniarlugu ataatsimut katarsorneqarnissaat pillugu periaasissetut pilersaarummik naammassinnittooqassaaq, assersuutigalugu ilaatigut nukissiuutnik atuinikitsunik sanaartortoqarnera pillugu ilisimasat ataatsimut katarsorneqalerlutik.
- Pisortat sanaartugassaataannut avitseqatigiilluni sanaartornermut aningaasalersuisarnermi periaatsit naleqqussarneqarnissaat siunertalarugu inatsisit tassunga attumasut naleqqussarneqassapput nutarterneqarlutillu. Matuman i minnerunngitsumik inissianik sanaartornermut tunngassuteqartut, taakkumi Namminersorlutik Oqartussat aammalu kommunit avitseqatigiillutik amerlanertigut ingerlattarmatigit.
- Suliariumannittussarsiuussisarnermut inatsit nutarterneqassaaq aamma naleqqussarneqarlunilu erseqqissarneqassaaq, taamaaliornikkut sabinngisamik annerpaamik qulakkeerniarneqassaaq neqeroorutit kommunimut tunniunneqartartut kiffaanngissuseqarluni unammilleqatigiinnermik aallaaveqartinneqarnissaat, taamaaliornikkut ilaatigut akit pillugit neqerooruteqartartut akornanni siumoortumik isumaqatigiissuteqartoqarneratigut pisariaqanngitsumik qaffassaasoqarsinnaanera pinngitsoortinniarneqassaaq.

- Namminersorlutik Oqartussat inissianik ornittakkanillu pisortat pigisaannik sanaartornermi tunngaviusumik atugassianik ataatsimoortumik kommunillu akeqanngitsumik atorsinnaasaannik pigisaqalernissamik isumaginninnissaat pisariaqarsorinarpoq, taamaalilluni kommunit pinerit tamaasa nutaanik aningaasartuutaasaqisunillu naqqaniit sanaartugassatut siunnersuutinik pissarsiniartariaarullugit.
- Kommunit sanaartornermik ingerlatsinerat pillugu ukiumoortumik Inatsisartunut agguassassanik nalunaarusiortoqartassaaq.

Atassummit qularutiginnigarput nutaamik aaqqissuussinerit siuliani taakkartukkagut sanaartornerup iluani, matumani pingaartumik inissianik sanaartornermi, ajornartorsiutit millisarneqarnissaannut annertuumik tapertaassasut.

Tamakkuninnga tunngavilersuuteqarluta siunnersuut Inatsisartunut suliassanngortipparput.

Josef Motzfeldt, Inatsisartut Siulittaasuat (IA)

Qujanaq. Finn Karlsen Atassummiit taama siunnersummik saqqummiivoq.

Akissuteqassooq naalakkersuisuninngaanniit Ineqarnermut Attaveqarmut, Angallannermullu Naalakkersuisoq.

Jens B. Frederiksen, Ineqarnermut, Attaveqarmut Angallannermullu Naalakkersuisoq (D)

Qujanarujussuaq.

Sanaartugassat Namminersorlutik Oqartussaniit kommuninut tunniunneqartalernissaannut kommuninut KANUKOKA-mullu isumaqtiginninniarnerit aalajangersimasut tunngavigineqartarnissaat Naalakkersuisut anguniagassamittut nalunaarutigisimavaat.

Maannamut sanaartornermi suliassat arlallit nammineq piumassutsimut, isumaqtiginnermut tunngavissat aammalu isumaqtiginninniarnerit aalajangersimasut tunngavigalugit kommuninut ataasiakkaanut tunniunneqartarsimapput.

Pineqartorli tamanna inatsisitigut maligassiunneqareersimavoq. Taanna suliassaqarfimmut 80 – 89-imut Sanaartugassanut Iluarsagassanullu tunngasumut oqaasertaliussani nr. 5-imi

takuneqarsinnaavoq.

Aamma oqaasertaliussamut nassuaatini allassimavoq, "Oqaasertaliussakkut pilersaarummut aalajangersimasumut aningaasaliissutinik kommuninut tunniussinissamut Naalakkersuisut periarfissaqalerput. Sanaartugassat sapingnisamik kommuninut ataasiakkaanut tunniunneqartarnissaa Aaqqissusseqqinnermut Ataatsimiititaliap inassutigaa. Kommunip sanaartugassaq isumagerusuppagu aningaasaliissutit malinnaanissaat nalequnnerpaassaaq, taamaalilluni kommuni suliap aaqqinneranut tamakkiisumik sunniuteqarlunilu akisussaassammat."

Sanaartornermi ersarinnerusumik, ammanerusumik paasuminarnerusumillu ingerlatsinissamut apeqqummut kissaateqarnermullu tunngatillugu, allaffissornikkut suleriaatsit suliat ersarinnerulernissaannik kissaateqarneq anguneqarsinnaalersillugu aaqqissunneqarsinnaasut Naalakkersuisut naliliippu.

Sanaartornerup iluani akit aalajangerneqartarnerinik nakkutilliineq pillugu apeqqummut tunngatillugu, suliassaqarfiup iluani unammilleqatigiinneq, taassumalu saniatigut Unammilleqatigiinnermut Ataatsimiititaliap akuliunnissamut periarfissai sanaartugassallu qitiusumik aqunneqarnerat pissutaallutik, kvadratmeterimut akiusut eqqarsaatigalugit nunap aningaasaqarnikkut pisinnaasaasa sinnerneqannginnissaat qulakkeerneqassasoq Naalakkersuisut naliliippu.

Aningaasalersuisarnernut agguataarneqartartunut, soorlu inissialioriternernut tunngatillugu ilisimatitsissutigisinnaavaara, suliniutissat suut pisariaqartinneqassanersut naliliiffiginiarlugu Naalakkersuisut inatsisinik nalilersuinerlik annertuumik aallartitsereermata.

Kommunini sanaartornernut akisussaaffik nalinginnaasumik kommunini aqutsinermut inatsit naapertorlugu communalbestyrelsini inisisimareerpoq.

Inatsisartut ataatsimiinneranni matumani Naalakkersuisut imm. 115-itut sanaartornermi neqerooruteqartitsisarneq pillugu Inatsisartut inatsisissaattut siunnersummik saqqummiussaqarput. Taamaattumik siunnersuut taanna akuerineqassappat,

tamanna suliariumannittussarsiuussisarnermut inatsit eqqarsaatigalugu pissutsinut uparuarneqartunut iluaqutaajumaartoq Naalakkersuisut naatsorsuutigaat.

Pilerausiorneq pillugu apeqqummut tunngatillugu pilerausiorneq nunaminertanillu atuineq pillugu Inatsisartut peqqussutaat nr. 11, 5. december 2008-meersoq innersuussutigisinnaavara.

Sanaartugassat pilerausiornerannut inatsisitigut sinaakkutissanik eqaatsunik, kommunini qitiusumillu pilerausiornermut piffissamut naleqquutnik paasiuminarsakkanillu maleruagassiorfiusinnaasunik peqalernissaq, siunnersuuteqarnermi pingarnertut siunertarineqarpoq.

Illuliornermut maleruagassanik iluarsaassineremi pisussami sanaartornerup ataatsimut katillugu aningasaqarnera eqqarsaatigalugu avatangiisit nukimmillu sipaarniarnissap maannamut naleqqiullugu eqqarsaatigineqarnerunissaat pingartinneqassaaq. Iluarsaassinissap 2010-mi aamma 2011-mi pinissaa naatsorsuutigineqarpoq.

Illoqarfinni illulianik, illuloriaatsinik nalinginnaasunik akikitsunik atuiffiusunik sanaartornissaq pillugu Naalakkersuisut maannakkorpiaq kommunit suleqatigaat. Illuloriaatsinik taamaattunik illulianut allanut, soorlu atuarfinnut sullissivinnullu allanut ineriaartortitsisoqarsinnaanera Naalakkersuisunit tunuarsimaarfingineqanngilaq.

Kommunini sanaartorneq pillugu ukiumoortumik nassuaasiortarnissaq eqqarsaatigalugu, tamanna sanaartugassanik kommuninut tunniussinissamut isumaqtiginninniartarnernut pissusissamisoortumik ilaasussatut ilanngunneqassaaq.

Naalakkersuisut taamatut oqaaseqarlutik aalajangiiffigisassatut siunnersuut taperserneqassanngitsoq inassutigissavaat.

Kisianni naggataatigut oqaatigilaassavara, soorunami Atassutip siunnersuutaa suliaq ingerlareersumut ilanngunneqarumaartoq.

Qujanaq.

Josef Motzfeldt, Inatsisartut Siulittaasuat (IA)

Ineqarnermut, Attaveqarnemut Angallannermullu Naalakkersuisoq qutsavigaarpuit. Partiit oqaaseqartuinut ingerlaqqissuugut, tassalu siulliussaaq Aqqaluaq B. Egede, Inuit Ataqatigiit.

Aqqaluaq B. Egede (IA)

Qujanaq.

Ukiuni makkunani aaqqissuussaanikkut allannguinerit nallerneranni pissusissamisoorpoq, suliassaqarfitt kommuninut nuunneqartussat suulluunniit pilersaarusrorluakkamik sullissinermik pitsaanerusumik eqaannerusumillu aaqqiinissamik siunertaqluni isumannaarneqartarnissaat.

Namminersorlutik Oqartussat sanaartornermut aningaasaliissutigisartagaasa kommuninut nuunneqarnissaat pissasoq Inuit Ataqatigiinnit isumaqarpugut. Pitsaasumik sinaakkutissiornikkut ullumikkut ajornartorsiutaasut iluarsineqarnissaat siunertaralugu sulinissaq pisariaqarmat.

Aamma isumaqarpugut pingaartuusoq Namminersorlutik Oqartussat kommunillu peqatigiillutik sanaartugassanut aningaasaleeqatigiittarnerat kommuninut tamakkiisumik nuunneqassappat, kommunit artukkerneqannginnissaat qulakkiissallugu pingaaruteqartoq.

Ilisimavarput atuarfiit Nunatsinniittut arlaqartut annertuumik asserfallassimapput, aningaasarparsuarnik nalilimmik nutarterneqartariaqartut. Taakkuuppullu ukiuni amerlanerusuni utaqeqqissinnaanatik nutarterneqarnissamik oqariartuuteqarlutik qinnuteqartartut.

Taamaammat Inuit Ataqatigiit isumaqarpugut sanaartugassanut aningaasaliissutit kommuninut nuunneqannginnerini, misissuinerit annertuumik sukumiisumillu ingerlanneqartariaqartut. Aningaasaliissutit nuunneqartut piffinni pineqartuni sanaartugassanut nutartigassanullu naapertuuttuunissaat pingaaruteqarmat. Siunnersuummi matumani tunngavilersuutigineqartut annertuutigut isumaqatigaagut, Namminersorlutik Oqartussat sanaartugassanut aningaasaliissutigisartagaat sumiiffinni sanaartugassanut nutartigassanullu pisariaqartitanut toqqaannartumik sammitinneqalissammata.

Taamatut naatsumik oqaaseqarluta Inuit Ataqatigiinni Naalakkersuisut sanaartornermut inatsisissatut siunnersummik saqqummiussaqarniarnerannut ilanngullugu siunnersuut una suliamut ingerlareersumut tapertassatut attaveqarnermut ineqarnermullu ataatsimiisitaliamut suliasassanngorlugu ingerlatinneqassasoq inassutigaarpit.

Josef Motzfeldt, Inatsisartut Siulittaasuat (IA)

Qutsaavigaarpit Inatsisartunut ilaasortaq Aqqaluaq B. Egede, Inuit Ataqatigiit.

Iniminngaanniit oqaaseqarumasoqarpoq, naamik.

Qutsavigaatsigit.

Tulliulluni oqaaseqartussaq, partiit oqaaseqartuinut ingerlaqqippugut, Inatsisartunut ilaasortaq Jens Immanuelsen, Siumut.

Jens Immanuelsen (S)

Qujanaq.

Atassutip Inatsisartunut ilaasortaat siunnersuuteqarput sanaartornermi aningaasaliuttakkat kommuninut ingerlatsitassanngorlugit, Inatsisartut siunnersummi ataatsimoortumik Naalakkersuisut saqqummiuteqaaqqullugit piumasaralugu.

Januar aallaqqaataani atuutilersumi kommunit sisamaannangortinneqarnerannut atasumik sanaartornerat kommuninit tigujartuaanneqarnissaat innersuussutaareerpoq. Naalakkersuisullu siuliini annertuunik sanaartortoqassatillugu periuuseq atorneqartarpoq, oqartoqarluni sanaartugassamut annertuumut aajuku aningaasat atugassat ilissi sanaartorneq taanna aqunniarsiuk. Kommuninut sanaartugassanik aalajangersimasunik innersuussisarneq, Naalakkersuisuusimasunit piviusunngortinniarneqarpoq, kommunit aaqqissuuteqqinneranni Siumumiit nalunngilarput suliassaqarfittigujartuaarnissaannut kommunit piffissamik aningaasanillu atorfissaqartitsisut. Minnerunngitsumullu inatsisit pioreersut nalimmassarneqartariaqarnerat eqqarsaatigalugu.

Siunnersummi Naalakkersuisut piumaffigineqarput inatsisit allangortillugit saqqummiuteqillugit. Taamaammat tupigilluinnarlugu Simiumiit paasivarput Inatsisartunut ilaasortanit peqquneqarnertik Naalakkersuisut soqtiginnngilluinnaraat. Siunnersummut minnerpaamilluunnit akissuteqaratik nassuaateqaratillu. Tamanit ilisimaneqartoq tassaavoq Inatsisartut Naalakkersuisunik

sulisitsisuunerat, Naalakkersuisut suli maannamut ilikkarsimanngisaat iliniallaqqullugu Naalakkersuisunut piumasarissavarput, kingullermilli ipassaq Siumumiit oqariartuitigisarput, tassa pitsaanerup pingasunngorlugu avinneqarsimanera kikkut tamat oqartussaaqataanerannut tunngavigisarput Naalakkersuisunit malinneqartariaqalernera sakkortuumik piumasaralutigu.

Taamatut oqaaseqarluta Naalakkersuisut Inatsisartunit peqquneqarnertik tunngavigalugu qanoq qisuariassanersut nalulluinnaratsigu, akitinnagit siunnersuut tapersorsornartikkaluarlugu, annertunerusumik oqaaseqarfingissanngilarput.

Erseqqissaatigissavarali Inatsisartut pingasunngornermi ataatsimiinneranni oqaluuserinninneq oqaluuserisatsinnut tunngatillugu aallartereertoq akissuteqaat tigusimavarput, taassumallu kingunerisaanik allannguinissamut periarfissaqarsimanata.

Taamaattumik naggaterpiaani oqaatigissavara Attaveqarnermut, Ineqarnermut Ataatsimiisitaliamut suliassanngorlugu ingerlatinneqarnissaa innersuukkatsigu.

Josef Motzfeldt, Inatsisartut Siulittaasuat (IA)

Qujanaq Inatsisartunut ilaasortaq Jens Immanuelsen, Siumut.

Erseqqissaatigissavara qulequttami uani Naalakkersuisut sulissuteqaqqullugit ullumikkumut saqqummiinissaat pineqanngimmat. Aamma suleriaaserput malillugu aalajangersakkat najoqqutaralugit Naalakkersuisunut piumasaqataanngilaq pinngitsooratik Inatsisartunut akissummik aquaassereernissaat. Taanna 2002-mi suleriaaseq allanngortinneqarmat pisariaqartinnejarsimanngilaq inatsisartuninngaanniit, soorunami allanngortikkusunneqarpat suleriaaseq, suleriaatsimut allannguutissamik saqqummiussisoqarsinnaavoq.

Aamma amerlanerpaatigut Naalakkersuisut agguaagajuttarput, tamanna aamma qularnanngilaq partiit oqaaseqartuisa oqaaseqaatissamunnut suliniarnerminni iluaqutigisarmassuk. Taamaattoq tassa piumasaqataanngilaq pinngitsooratik saqqummiinissat, ileqquliuunneqaaannarsimasutut oqaatigisariaqarpoq, ileqqoq pitsaasoq, taamak immaqaa oqaatigiinnaraanni pitsaaneruvoq.

Tulliulluni oqaaseqassaaq Inatsisartunut ilaasortaq Andreas Uldum, Demokraatit.

Andreas Uldum (D)

Qujanaq.

Naalakkersuisut nutaat qaammatini tallimaannarni maannamut sulipput. Maannakkut ataatsimiinnerput siunnersuutinik saqqummiussivigissallugu Naalakkersuisunut perngaamik periarfissaasimavoq. Taamaattumik Demokraatit siutaanni tusaqqusaarneruallaaluatsiarpoq Atassut Naalakkersuisut siuliini Naalakkersuisooqataasimasoq, Naalakkersuisunik isornartorsiormat. Inatsisartut suliniutitut akuersitinniaannarlugit piviusorsiunngitsumik minnaalaruni missingersuusiorsimaneraalluni.

Matumani assersuut taaneqarsinnaavoq Ilimmarfik Atassutip minnaalaruni missingersuusioqataaffigisimasa sanaartugassaq akueritinniarlugu. Ilumut maannakkut Naalakkersuisuusut piviusorsiunngitsumik minnaalarutik missingersuusiorsimanersut kingusinnerusukkut aatsaat paasisinnaasussaavarput. Taamaattumik Demokraatini upernarsivarput Atassutip isornartorsiuinera Inatsisartunut kingulermik qaammatit tallimat matuma siorna qinersigatta innuttaasut narrugalugit igitaannut Naalakkersuisuusimasut issornartorsiuineruvoq.

Aamma Atassut allappoq, takukulavallaarpalput qanoq ajortigisumik kinguneqarsinnaasoq sukumiisumik eqqarsaqqaaranani piareersaqqaaranilu naleqqussaanerit aallartinneqaraangata, innuttaasut akuliutinngilluinnarlugit. Demokraatit atsaat taamak isumaqataatigippit, uppermarseqqiinnarpulli isornartorsiuiineq Naalakkersuisuusimasunut Atassutip Naalakkersuisooqatigimasaannut isornartorsiuinerummatt.

Demokraatit upperilluinnarpaat Naalakkersuisut kusanartumik inatsisiliorsinnaasut qulakkeerlugu Namminersorlutik Oqartussat sanaartornermut iluartissimasaat pisarissersuutaanngitsumik kommuninut aqulassanngorlugit tunniunneqarnissaat. Siunersuut maanna Atassutip siunnersuutaa akuerissagutsigu Naalakkersuisut qilersussavagut, aalajangersimaqqissaartumik inatsisilioriaateqaqqullugit.

Pineqartumi inatsisiliornissaq pillugu Demokraatinit Naalakkersuisut suleqatigerusunneruagut. Demokraatinilli Naalakkersuisut kaammattorusuppagut sanaartornermut tunngasut pillugit

inatsisiliulerunik Atassutip siunnersuusiamini eqqarsaatigisimasaasa ilaat ilanngullugit eqqarsaatigeqqullugit. Ingerlatiinnarlugu Ineqarnermut Attaveqarnermut Angallannermullu Naalakkersuisoq kaammattorusupparput ullumi oqallinnermut malinnaalluaqqullugu, suleqqinnissamini atorsinnaasamik isumassarsiorsinnaaqquullugu.

Taamatut oqarluta Demokraatiniiit inassutigaarpuit siunnersuut itigartinneqassasoq. Qujanaq.

Josef Motzfeldt, Inatsisartut Siulittaasuut (IA)

Qutsavigaarpuit Inatsisartunut ilaasortaq Andreas Uldum, Demokraatit.

Iniminngaanniit oqaaseqarumasoqarpoq, Inatsisartunut ilaasortaq Siverth K. Heilmann, Atassut.

Siverth K. Heilmann (A)

Qujanaq Siulittaasoq.

Demokraatit oqaaseqartuat Andreas Uldum malugisinnaavara illit nammineerlutit soorunaami oqaaseqaasiorsimanavianngitsutit, kisianni uparuaanerit sakkortooq kikkulluunniit siunnersuuteqarsinnaatitaapput, partiit, partiinit ilaasortat aamma Naalakkersuisuusimanitsinni uparuartorneqartarpugut, ippasannguarluunniit aatsaat akisussaaffimmik tigusigaluartugut uparuarussutaasinnaasunik. Taanna ilequusorujussuuvoq Demokraatininngaanniit.

Taamaattumik suleqatigiilluarnissamik siunnersuummillu tunngavilersukkanik tunniussaqartilluta, taamatut akipajuinnarneq sulineq pitsaasuunngilaq. Minnerpaamik nalilersuinissaq ataatsimiisitaliami partiit oqaaseqartussai, oqaaseqaatai aallaavigalugit sulineq pitsaanerpaasarpoq. Aamma malugisinnaavarput ilaatigut atuarfinni sanaartornissamut finanslovimi ilanngarterisoqarpoq. Tamakkua ataqtatigiissappata torersumillu suli ingerlassappat, siunnersuutit taamapajuinnaq akineqarneri Atassumminngaanniit akueriuminaatsipparput. Taamatuinnaq oqaaseqarpunga. Qujanaq.

Josef Motzfeldt, Inatsisartut Siulittaasuut (IA)

Qujanaq. Oqaaseqartoq.

Andreas Uldum (D)

Eqqissisarsinnaavakkit oqarlungalu oqaaseqaat nammineq suliarivara. Taava aamma siunnersuuteqarsinnaaneq kikkunnilluunniit, kikkulluunniit siunnersuuteqarsinnaanerat aamma apeqqusinngilluinnarparput ataasinnguamilluunniit. Kisianni oqaatsitit kingulliit oqaaqqissaarinertut taassanerpakka, imaluunniit oqaatsitit tamaasa tiguakka eqqarsaatigumaarpakka aamma. Qujanaq.

Josef Motzfeldt, Inatsisartut Siulittaasuat (IA)

Inatsisartunut ilaasortaq Hans Enoksen, Siumut.

Hans Enoksen (S)

Qujanaq Siulittaasoq.

Tassa Demokraatit oqaluttuata Andreas Uldumip innuttaasut oqartussaaqataanerat maani mitallerlugulusooq oqaaseqarnera akueriuminaatsippa, tassa qinikkat maani pisinnaatitaaffiata atorlugu Atassut siunnersuuteqarpoq. Taavalu ilaatigut oqaatsit sakkortuut atorpatit, soorlu kingutsisiorneq qinersigatta innuttaasut narrugalugit igitaannik, taamatut oqaluttoqarsinnaanngilaq maanimi inimi.

Nalunngilarput aamma maani qinigaanngitsunik sinniisussanik arlalinnik peqataasoqartoq, aamma taakku ataqqivagut innuttaasut toqqarmatigit. Taamaammat mitallerneq taanna akueriuminaatsippa maani inersuarmi, inuttaasut qinigaannut. Atassut pisinnaatitaaffeqarpoq allatulli aamma siunnersuuteqarnissaminut. Taanna akuerisinnaanngilara taamatut oqariartuuteqarneq.

Josef Motzfeldt, Inatsisartut Siulittaasuat (IA)

Oqaaseqartoq isumaqatigivara, tassa neriuuppunga aamma oqaaseqartoq kingulleq Siuminngaanniit isumaqatigivara aamma Demokraatit oqaaseqartuata oqaaseqarnermini taanna nalilissagaa. Oqaaseqartoq.

Andreas Uldum (D)

Oqaatsitit siulliit siunnersuuteqarnermut tunngasut akereernikuugakkit, kisianni oqaatsitit sinneri tusaatissatut tigukuttoorumaaarpakka.

Josef Motzfeldt, Inatsisartut Siulittaasuat (IA)

Inatsisartunut ilaasortaq Finn Karlsen, Atassut.

Finn Karlsen (A)

Qujanaq.

Tassa uanga aamma aatsaafaarik Inatsisartunut ilaasortaq Hans Enoksenip oqaaserisai tassa tunngavigneruakka immikkut oqaaseqarumaninnut. Kisianni soorunami siusinnerusukkulli nalunngereertarpalput tusartareerlugulu misigisareerlugulu Demokraatit qanoq nikaginnittartigisut inuit allat qinigaannut partiini allaniittunut. Taanna ilisarnarseqqippoq uani. Assorujussuaq, ila uangaluunniit kanngugissavakka tappikkani oqaatigissallugit oqaatsit taamaattut, igitaat narrugalugit igitaat. Tassa Inatsisartunut ilaasortat maaniittut narrugalugit igatat sulippat, inuiaqatigiit qinigaat.

Tassa oqaassisqaarnaraluarpoq taamak una sakkortutigisoq oqaaseq, aperissavakkit taamatut ilumut narrugaluta maani igitaavugut sulilluta.

Josef Motzfeldt, Inatsisartut Siulittaasuat (IA)

Oqaaseqartoq.

Andreas Uldum (D)

Aallaqqaammut nikaginninnermut tunngasunik isummatit illit taakku nammineq pigissavatit, nikagisaqanngilagut. Kisianni oqariartaatsinuna atorippalput allanngornerujussuaq inuiaqatigiit qinigaannut tunngatillugu taamatut allannikuugiga.

Josef Motzfeldt, Inatsisartut Siulittaasuat (IA)

Inatsisartunut ilaasortaq Hans Enok, Siumut.

Hans Enoksen (S)

Qujanaq Siulittaasoq, aamma oqaatsinut nuanniitsunut naqqiissuteqarninnut. Taamaalilluta aamma uppernarseqqipparput maani Inatsisartuni sulinerput illersorneqartoq Siulittaasutsinnit.

Qujanarujussuaq.

Taavalu uani ilaatigut Andreas Uldumip Ilimmarfik pillugu oqaaseqarnermini taallatsiagaa minnaaraluni missingersuusiornermi allaat nipilimmik pasilliuteqarneq, taanna ilumuunngilaq. Sapinngisarput tamaat eqqortumik missingersuusiornerit Naalakkersuisut sullinneqartarput atorfilittaminnit, piaarisoqarneq ajorpoq. Taamatut oqariartoqattaarneq ilumut ilungersunarpoq. Tulliani torernerusumik oqariartuuteqarnissarsi kaammattuitigiinnassavara. Naalakkersinnaanngilassi, kisianni kaammattuitigissavara torernerusumik ilaatigut nalilersuinerit maani ingerlanneqartassasut.

Josef Motzfeldt, Inatsisartut Siulittaasuat (IA)

Oqaaseqartoq.

Andreas Uldum (S)

Tusaatissatut tiguakka aamma taakku.

Josef Motzfeldt, Inatsisartut Siulittaasuat (IA)

Tulliulluni oqaaseqasaaq Inatsisartunut ilaasortaq Aqqaluaq B. Egede, Inuit Ataqatigiit.

Aqqaluaq B. Egede (IA)

Qujanaq.

Tassa Inuit Ataqatigiit sinnerlugit oqaaseqartut aamma kaammattuitigissavara partiinut allanut oqaaseqartumullu qinikkat imminut akornatsinni tatigeqatigiinnermik aammalu nikassaarpalaartumik nipeqartunik oqaaseqaateqartarneq taanna qimakkiartuaarneqarnissaa innersuussutigerusuppara. Tassa Demokraatit oqaaseqaataani innuttaasut narrugalugit igitaannik qinikkanut oqariartuuteqarneq, taavalu aamma Siumut oqaaseqaataani Naalakkersuit ilikkarsimanngisaminnik ilinniaqqullugit piumasaqarneq, isumaqarpunga oqaatsit tamakku atorneri naliginnerusumi oqallinnermi sangutinneqartariaqartut.

Taamatut naatsumik innersuussuteqarlunga neriuuppunga suleriaqqinnitsinni oqaatsit tamakku atorneqannginnissaat tamatta pingaartissagipput. Qujanaq.

Josef Motzfeldt, Inatsisartut Siulittaasuat (IA)

Oqaaseqartoq.

Andreas Uldum (D)

Tusaatissatut taakkua tiguakka, tamatsinnut aamma oqariartuutaammata neriuppunga allat aamma tusarsimassagaat. Qujanaq.

Josef Motzfeldt, Inatsisartut Siulittaasuat (IA)

Paasinarpooq suliassaq taanna soqutigineqarluni ingerlaqqittussanngortinneqartoq. Oqaaseqarumasoq tulleq Inatsisartunut ilaasortaq Finn Karlsen, Atassut.

Finn Karlsen (A)

Qujanaq.

Tassa uani taamannak tusaqqusaaginnartutut siunnersuuteqarsimasutut oqaatigeriarluta taamannarujussuaq nikassariarluta naggataatigut suliat siunnersuutitta ilai ilanngunneqassasut oqaatigai. Qanoruna paasisariaqartoq tamanna taamatut nikassaatigaluni oqaloriaarluni siunnersuut aamma iluatigalugu ingerlateqqitassatut innersuukkit. Taanna paasiumpinaatsipparput.

Josef Motzfeldt, Inatsisartut Siulittaasuat (IA)

Oqaaseqartoq.

Andreas Uldum (D)

Qujanaq.

Naalakkersuisut ikissuteqaatigisamini eqqaareerpat suliat ingerlareertunut ilai assingusinnaammata, taanna tunngavigalugu taamannak oqarpunga.

Josef Motzfeldt, Inatsisartut Siulittaasuat (IA)

Inatsisartunut ilaasortaq Siverth K. Heilmann, Atassut.

Siverth K. Heilmann (A)

Qujanaq Siulittaasoq.

Inatsisartunut sinniisuullutik orloertoqarneralu aallaavigalu uagutsitorluinnaq sulisut Atassumminngaanniit ataaqqivagut, aamma ilissi. Taamaattumik Inatsisartuni qinikkatut sulinitsinni

oqariartutigisagut taamak sakkortutigisut, neriuppunga Siulittaasoqarfiup uani oqaaserineqartut Demokraatininngaannit nalilersulaartariaqassagai.

Minnerpaamik piumasarissavarput Atassumminngaanniit utoqqatserfigineqarnissarput Demokraatinit, taamak torinngitsigisumik Inatsisartunut oqaluttarfiat partii inuit qinigaallu saassunneqarsinnaaneri. Qujanaq.

Josef Motzfeldt, Inatsisartut Siulittaasuat (IA)

Oqaaseqartoq.

Andreas Uldum (D)

Tusaatissatut tiguara.

Josef Motzfeldt, Inatsisartut Siulittaasuat (IA)

Qujanaq.

Allanik oqaaseqaqqikkumanngilaq. Kisianni taanna eqqaassissutigissavara inimi maani mattulluta oqaluuserinnituunngilagut. Avammut tusarnaarneqarluta, avatitsinnit tusarnaarneqarluta inuiaqatigiinnut naleqqersuusuuvugut oqaatsinik immitsinnik ataqeqqatigiinnermik naleqarluta ingerlatsinissatinnut. Taamaammat oqaqqissaarutitut iniminngaanniit oqaatigineqartut tamatsinnut qanortoruna pukusummioralugu sulinerput ingerlateqqinniartigu. Pissuserissumik maani ingerlasussaavugut inuiaqatigiinnut siuttutut qinigaasimagatta.

Oqaaseqartussaq tulleq Inatsisartunut ilaasortaq Siverth K. Heilmann, Atassut, partiimi siunnersummut isumaannik saqqumiissooq. Takanna.

Siverth K. Heilmann (A)

Qujanaq. Siullermik aallartivitsinnanga aamma erseqqissaatigilaassavara una akissutigisarput pingasunngormat saqqummiutiliivillugu aatsaat Naalakkersuisut akissut qallunaatooq uannut apuunnikoq, kisianni akissutissarput utaqqinagu aamma utaqqisariaqannginnatsigu akissutissarput, imatut ilusilik saqqummiutissavara Atassumiit.

Naak massa Inatsisartunut ilaasortat siunnersuutaannut Naalakkersuisut akissuteqarnissaminnut pisussaaffeqanngikkaluartut, Atassummiit isumarpalut malillugu siunnersuutitsinnut pingaaruteqarluinnartumut isummerumasimannginnerat, akerusussimannginnerallu assut ilungersunartutut nalilerparput.

Nunatsinni pisortat sanaartortitsinerisa oqaluttuarisaanerani aammalu sanaartornermut iluarsagassanullu aningasaateqarfip pilersinneqarnerata oqaluttuarisaanerani sanaartugassatut pilersaarutigineqartut kinguaattoorutaasarerat, aammalu missingersuutigisamit akisunerusarnerat inuiaqatigiinnut ajornartorsiutaavoq annertooq, aammalu qaangerniarneqartariaqartoq.

Nunatsinni kommunit sanaartornermut akisussaaffimmik tamakkiisumik ilaannakortumilluunniit tigusissappata tigusissanngippataluunniit Atassummit qularutiginngilarput sanaartornermut tunngatillugu nutaamik eqqarsarnissarput aammalu periaatsinik nutarterinissarput pisariaqartoq. Tamanna siunertalarugu Atassummi inatsisituut toqqammavagineqartut ataatsimoortinnejarnissaat aammalu erseqissaavagineqarnissaat pisariaqarfiatigullu nutaanik ilaneqarnissaat ullumikkut killiffigineqartariaqalersoq.

Siunnersuutitsinni saqqummiussisutta tunngavilersuutitigut erseqqissumik nassuaatigereermagit naatsumik taamatut oqaaseqarluta Atassummiit inassutigissavarput siunnersuut akuersaartumik suliarineqassasoq, aappassaaneerneqartinnagulu Inatsisartut Ineqarnermut Ataatsimiisitaliaannut suliassanganngortinnejarnissaat.

Qujanaq.

Josef Motzfeldt, Inatsisartut Siulittaasuat (IA)

Inatsisartunut ilaasortaq Siverth K. Heilmann qutsavigaarpalut Atassumminngaanniit isummamik saqqummiineranut. Iniminngaanniit oqaaseqartoqarumanngilaq. Akissuteqarsimannginnermut ilaatigullu aamma oqaatsit atorneqartut isummerumasimannginnerat, akerusussimannginnerallu taanna siullermik oqaatigeriikkattut ilaatigut Naalakkersuisut soorunami periarfissaq alla atorsinnaasaat tassa oqaasiinnartigut naqitanik agguaanatik oqaasiinnartigut oqaaseqarnissaat.

Taamaattumik massakkumut suleriaaserput najoqqutaralugu taanna piumasaqaataanngiimmat allangortikkusunneqaruni oqareernittuut taanna inatsisartuni nutarterinissami siunnersuutigineqarpat, taanna soorunami iluarseriarneqarsinnaavoq.

Kisianni ingerlaqqippugut, Kattusseqatigiit partiianit oqaasepartussaq Inatsisartunut ilaasortaq Jakob Skade.

Jakob Skade (KP)

Qujanaq.

Qulequataa atuanngikkaluarlugu Kattusseqatigiit Partiianiit siunnersuut imaattumik oqaaseqarfigissavarput. Kattusseqatigiit Partiianiit isumaqarpugut ukiuni makkunani Kalaallit Nunatta aningaasaqarniarnikkut pitsaanerpaamik inissisimannginnerata nalaani Naalakkersuisut maannakkut sanaartugassanut tunngasut pillugit pilersaarusrionerat suliassanillu pingaarnersiuillutik ingerlatsinerat periarfissinneqartariaqartoq.

Minnerunngitsumik pisariaqartitsineq naapertorlugu aammalu aningasat sanaartukkanut amerlanerpaamik pilersitsiviusumik inuiaqatigiinnullu uluaqutaanerpaamik sunniuteqarnerpaamillu atorneqarnissaat qulakkeerniarlugu suliniuteqarnermi angusaqarluarnissaat piviusunngortikkumallugu.

Taamaattumik Kattusseqatigiit Partiianiit Atassutip Inatsisartunut ilaasortaataasa siunnersuutaat ilaatigut ilalermartinneqarsinnaagaluartut, taamaakkaluartoq Naalakkersuisut pilersaarutit ingerlatitariigaat Kattusseqatigiit Partiianiit tutsuiginartinneruagut aammalu tamakku pillugit kommuninut KANUKOKA-mullu isumaqatigiinniutiginissaat eqqarsaatigalugit.

Taamatut oqaaseqarlunga Kattusseqatigiit Partiianiit nalunaarutigissavarput siunnersuut akuerinnginnatsigu.

Josef Motzfeldt, Inatsisartut Siulittaasuat (IA)

Qujanaq Inatsisartunut ilaasortaq Jakob Skade Kattusseqatigiit Partiannit. Qutsavigaatsigit.

Tassalu oqaluuserinninneq taanna ingerlaqqitsinnagu oqaatigissavara Inatsisartuni amerlanerussuteqarluartut siunnersuutigineqartup uuma Ineqarnermut Attaveqarnermullu Ataatsimiititaliamut ingerlatinneqaqqinnissaa innersuussutigimmagu, suliareqqinnissaalu toqqammavissarissaarpuit.

Siunnersuuteqartut sinnerlugit Finn Karlsen, Atassut.

Finn Karlsen (A)

Qujanaq.

Siunnersuutigisatsinnut tunngatillugu partiit oqaaseqartui tamakkiisumik uanga Kattusseqatigiit Partiat eqqaassanngikkaanni, Demokraatit taamannaannaq oqaloriaarlutik ilaa isumaqatigigamikku, suliassanut ingerlannissaa innersuussutigivaat Naalakkersuisut suliaannut.

Naalakkersuisut aamma oqaaseqaataanni ersarisorujussuarmik isumaqatigisaat amerlasoorpassuupput, siunnersuutigisagut amerlasoorpassuit taakkartorpaat, aamma nuannarivara suliaminik ilanngullugu ilanngutigisagaat aamma nalilersuiffgalugu. Taanna ajunngivippoq. Naalakkersuisut aallartitsereersimanerpoq taanna erseqqisumik oqaatigaa, kisianni aamma siunnersuutitta ilai iluatinnartoqaqimmata, taakku aamma nalilersussallugit ilanngunnissaat aamma innersuussutigivara. Qujavunga aamma takku tassunga Naalakkersuisoq taamak oqarneranut.

Taava aamma Inuit Ataqatigiit aamma qujaffigissavakka erseqqisumik oqaatigimmassuk, aamma pingaartumik ilaa assersuutitut taavaat atuarfeqarfinni massakkut sanaartorneq unitsinnejarsimammat, utaqqeqlissinnaanngitsut. Qujanartumik aamma Inuit Ataqatigiit taanna taavat, iluarsagassat massakkut kinguartinneqartut peerneqarnikut. Tassani uanga eqqarsaatigalugu taamak oqarpunga, aamma Inuit Ataqatigiit nuannarivakka taamatut oqarmata, utaqqeqlissinnaanngillat ilumoorpoq atuarfiit iluarsarneqarnissaat. Qujanartumik taanna taavaat, taanna nuannaarutigivara aamma oqaatigimmassuk.

Naak soorunami tunngaviatigut ersarissumik aamma ataatsimiititaliamut amerlanerussuteqarluartut ingerlatinissaat aamma isumaqatigiissutigereeraat oqaatigineqarpoq aamma aqutsisumit, soorunami qujavunga taamatut oqarmat. Kianni tassa partiit eqqarsaatigalugit Siumukkut oqaaseqarnerminnut aamma tunngavilersuutaat tassa aamma isumaqatigaat, taamaallaat sooq

Naalakkersuisut akisimannginnerat tassani eqqortumik isummerfiginissaanut kinguarsimaarlutik, kisianni massakkut oqaluttoq kingullermut allassimanngikkaluarlugu erseqqissumik oqaatigaa allaganngorlugu tigoreerlugu Naalakkersuisut akissutaat aamma paasillugu aamma siunnersuut taanna ataatsimititaliamut ingerlannissaa aamma piumasarigaat. Taanna nuannaarutigivara aamma.

Demokraatit oqaaseqarfigerusunnaraluarpulluunniit annertoorujussuarmik nikassaaneq tassani pimmassuk, tusaqquaaginnangajattutulluunniit oqaaseqartugut oqaatigimmagu, tusaqquaaginnangajattutut oqaatigeriarluta Naalakkersuisunut uparuatuinnermut oqaa... Naalakkersuisut uparuartunngivippagut uagut ataatsimilluunniit siunnersuutsinni.

Uparuartuinngiivippugut. Naalakkersuisuusut massakkut tassani pineqanngillat, siusinnerusukkut naalakkersuisuusartut aamma uagut naalakkersuisooqataasarnikuuvugut, pilersaarusrioneremi ilaanni kukkusoqartarsimavoq taamaattuminguna aningaasaleeqqittartugut, taamatut aamma oqarpugut. Taakkua pinaveersaarniarlugit pilersaarusrionluarnissaq siunnertaralugu siunnersuuteqarpugut. Uparuartuinngilagut Naalakkersuisunut, aamma massakkut Naalakkersuisuusut sumillunniit uparuartunngilagut.

Inatsisartunut akuerseqqittariaqartarpugut allatut ajornatumik pilersaarusrorneq aningaasaliinikippallaarnermik siunertaqartumik akuersisimagaangatta, taavalu aamma ilaatigut sanaartugassalluunniit aallartikkaluaannarlutik suliarinnittussarsiornermi aningaasat amerlanerujussuit neqeroorutigineqartaneri akuerineqartarnerat tunngavigalugit immikkut aningaasaleeqqittarpugut. Tassa taakkuukua pillugit pinaveersaarnissaat siunertaralugu siunnersuuteqartugut pilersaarusrionluarnerit malinnaaffigineqarluarsinnaanera.

Malinnaaqqaarnissaq eqqarsaatigalugu. Taamaammat uani uparuartuisugut oqarnera taanna uparuarterunngivippoq Naalakkersuisunut. Oqaatigaarput piviusummat uparuaanerunngilaq, taannaana allanngortikkusullugu siunnersuuteqartugut.

Aamma assersuutitut ilaatigut taavaa Ilimmarfik uagut taamatut imaat.. naluara Ilimmarfik uagut naalakkersuisuunitsinni akuerisimaneripput taanna, taamaagunanngiivippoq. Assersuutigisimasarsi kukkorujussuarsimاغونارپارسي. Demokraatit oqaaseqartuat erseqqissumik taamatut oqarfigissavara.

Assersuusiorsimagassi Ilimmarfik kukkusimagipput. Uagut akisussaaqataavugut akuerseqataagatta, akuerseqataaffigut akisussaafigissavarput qimarratigissanngilarput, pisuutitsiniassanngilagut ataatsimilluunniit, kisianni ilumoortumik oqarpugut taamaattut amerlavallaqimmata

pilerausiorluarneq anguniarlugu pitsaanerusumik siunnersuusiornissaq anguniarlugu siunnersuuteqarpugut. Eqqaamasakka malillugit Ilimmafik 2001-kunni aallartikkunarpoq, taava immaqa eqqaamanerlunngikkukku 2004-mi aningasaliivigineqavinnissaa aallartissoraara. Eqqaamanerlussinnaavara, aamma taamanikkut uanga aamma Naalakkersuisuvunga. Kisianni qimarratigissanngilarput tamanna. Uagut inatsiartuuvugut aamma taamanikkut. Inuit qinigaattut suligatta akisussaaqataavugut.

Taamaattumik assersuutigisimasarsi taanna Ilimmarfik taamatut tassa uagut pisimagipput, taanna soqtiginngilara taamatut pisuutitsigaluarussi. Inuit nalunngilarput silappaarissorsuusut inuit tamarmik Inatsisartut akuerissappassuk akuerissanngippassuk tamatta akisussaaqataavugut soorunami. Kisianni tassa nuannarivara Naalakkersuisut aamma oqareernittut soqtigivaat siunnersuutitta qitia, taamaattumik ataatsimiititaliamut aamma suliarineqarnissaa, taavalu namminneq ingerlateriikkaminnut ilanngullugu nalilersugassatut soqtigalugu oqaatigimmassuk.

Annerusumik oqaaseqarnanga tapersiisunut qujavunga.

Tassa ersarissumik Kattusseqatigiit Partiat kisiivimmi itigartitsivilluni itigartitsipput, naak Demokraatit oqaraluartut itigartillugu, kisianni ataatsimiititaliamut innersuuppaat.

Taamaammat nuannaarutigaara taamatut oqarneq, ataatsimiititaliamut nalilersorneqassasoq amerlanerussuteqarluartut innersummassuk. Taamatut naatsunnguamik oqaaseqarlunga qujavunga siunnersummut tassunga aappassaaneernissaanut ataatsimiititaliamut suliarianeqarnissaa innersuussutigineqarmat qilanaarluta utaqqissavarput.

Josef Motzfeldt, Inatsisartut Siulittaasuat (IA)

Siunnersuuteqartut sinnerlugu oqaaseqartoq ilumoorpoq, suliassaq ingerlateqqinneqartussanngorlugu Ineqarnermut Ataatsimiititaliamut aalajangersaavigineqareerpoq. Taamaammat oqaaseqartussat tulliuttut nutaavinnik isummanik saqqummiussinissaat naatsorsuutigalugu, siulliussaaq Inatsisartunut ilaasortaq Karl Lyberth, Siumut.

Karl Lyberth (S)

Qujanaq.

Tassa takisuumik oqaaseqassangilanga, kisianni saqqummiisoq Inatsisartunut ilaasortaq hr. Finn Karlsen isumaqatigiinnassavara una pimmagu, Inatsisartunut ilaasortasugut tamatta, aamma partiit akunnitsinni, tamatta immitsinnut ataqqinerulluta sulisariaqarpugut. Uani Demokraatit saqqummiinermini taanna saqqummiussaat inuttaasuninngooq narrugalugit igitaasut, taamatut Inatsisartuni oqalunneq atorfissaqanngilaq. Immitsinnut ataqqinerulluta sulisariaqarpugut aamma partiit suminngaanneeraluarpaluunniit aamma ataqqinerullugu sulisariaqarpugut.

Demokraatit kingullermi Inatsisartut amerlassusaat qiviarutsigit Demokraatit kingullermi arfineq marluupput, maannakkut sisamanngorput. Taamaakkaluartoq oqanngilagut Demokraatit igitaasut, taamatut oqartoqarsinnaanngilaq. Taamaattumik immitsinnut ataqqinerulluta piniarta, Demokraatit ikilinerat sisamaannanngornerat tusaatissatut tiguarput, qinersisartut taanna oqariartutigivaat. Aamma uparuarneqanngillat, narrugineqanngilaq, suneqanngillat, nikassarneqanngillat. Maani sulitilluta immitsinnut ataqqineruniarta aamma partiiniittut allaninngaannersut ataqqineruniartigit. Taamaattumik pingaarpoq tamakku maani oqaatsit atunnginnissaat uanga isumaga malillugu.

Josef Motzfeldt, Inatsisartut Siulittaasuat (IA)

Qujanaq.

Oqaaseqartut kingulliit ataatsimiinnermi aqutsisutut oqaaseqarfingeqareermata tulliulluni oqaaseqartissavara Demokraatininngaannersoq, Inatsisartunut ilaasortaq Andreas Uldum.

Andreas Uldum (D)

Qujassutiginirigaana ataqqeitatigiinnissamut oqariartuuteqaratta tamatta maanna.

Assersuutigisinnaagakku aamma ilaa oqallinnerni siullerpassuarni imatut assigiinngitsutigut nunaqarfinni assersuutigalugu matooriniartutut, meeqqanut inuusuttunullu sullissiumanngitsutut inissiisarneq. Aamma tammakku immaqa eqqarsaatigilaaraanni nikassaanertut aamma isigineqarsinnaammata.

Qujavunga assut ataqqeitatigiilluta massakkut suliniassalluta aalajangeratta. Qujanarujussuaq tamassinnut.

Josef Motzfeldt, Inatsisartut Siulittaasuat (IA)

Inatsisartunut ilaasortaq Jens Immanuelsen, Siumut, naggataarutaasumik iniminngaanniit.

Jens Immanuelsen (S)

Qujanaq.

Tassa siullermik Siumumiit oqaatigissavarput aalajangiusimagatsigu ataatsimiitaliamut suliassaq ingerlateqqinnejnarneranut oqariartuuteqarnerput. Kisianni Demokraatit saqqummiussaqarneranni imaannaanngitsut marluk qaangiinnarneqarsinnaanngitsutut, Inatsisartut suleriaasianni aalajangersakkat malillugit misigisimagakkit taakkua oqaatigissavakka. Inatsisartut Naalakkersuisullu minnaalarutik missingersuusiortarsimannerannik oqariartorneq inuit tamaat oqartussaaqataanerannut aalajangersaasarnermik innarliivoq, uanga isiginnittaasera malillugu Inatsisartunut ilaasortatut.

Aappaattut inuit qinigaannut taamatut partiimut ataaqqinnissuseqanngitsumik periaaseqarneq imaaliiinnarlugu qaangigassatut isiginnginnakku, Inatsisartut suleriaasianni aalajangersakkami § 48, immikkoortoq tallimaat matuma kingulianni Inatsisartut Siulittaasoqarfiannut uanga nammineq piumasarissagakku matumuuna ilanngullugu oqaatigaara. Qujanaq.

Josef Motzfeldt, Inatsisartut Siulittaasuat (IA)

Oqaaseqartoq.

Finn Karlsen (A)

Qujanaq.

Tassa uanga maanngaanniit ilumoorpoq ilungersunartupilussuuvoq taamatut oqaluttoqarnera, kisianni Inatsisartut oqaluttarfiat aqqutigalugu uanga taakkua oqaaseqarfingianngilakka. Alla aqqutigalugit taakkua suliassat isumaqarpunga taakku suliarineqassasut. Aamma Inatsisartut Siulittaasua erseqqissumik oqareerpoq maani taamatut pisoqarnera oqaluttarfitt atorlugit isumaqarpunga oqallisissaanngitsut taamaattut, ingasappallaarput. Taamaammat allat aqqutigineqassapput.

Josef Motzfeldt, Inatsisartut Siulittaasuat (IA)

Qujanaq. Aamma qutsavigaarput siunnersuuteqartut sinnerlugit naggiisoq Finn Karlsen, Atassut, Inatsisartunut ilaasortaq.

Taava Ineqarnermut, Attaveqarnermut Angallannermullu Naalakkersuisoq Jens B. Frederiksen, Demokraatit oqaaserineqartunut naliliissaq.

Jens B. Frederiksen, Ineqarnermut, Attaveqarnermut Angallannermullu Naalakkersuisoq (D) Qujanarujussuaq.

Oqarsinnaavunga soorunami Naalakkersuisuniit Naalakkersuisut sinnerlugit ataqqivarput ataatsimiititaliamut ingerlateqqinnejnarnera. Tassa taamaattussaasimammat ingerlateqqinnejqarsimavoq. Aamma oqaatigisinnaavara Naalakkersuisuninngaanniit sorpassuit tungaatigut isumaqatigigatsigut siunnersuutip imaqarnerani, taamaammat taanna aporfittut isiginngilarput aamma naatsorsuutigivarput qanumut ataatsimiititaliaq suleqatigissallugu. Ilaatigut atuarfiit, atuarfinnut tunngasunik suliassat unitsinnejnarneri oqaaseqartoqarpooq, tassa ilaatigut oqaaseqartoqarluni tassa peerneqarsimasutut. Kisianni oqaatigisinnaavara peerneqarsimanngitsut, kinguatinneqarsimapput.

Tassani uagut Naalakkersuisuni siunertarigatsigu nalilersoqqissaarneqarnissaat taavalu paasiniassallugu arlaatigut periarfissaqarnersoq akikinnerusumik immaqa aamma pitsaanerusumik suliarineqarnissaat. Siunertaanikuunngilaq peerneqavinnissaat. Aamma oqaatigisinnaavara atuarfippassuarni tunngasuni asserfallannerat ajorluinnartut, taakkua suliassat ingerlaqqiinnarsimapput kinguartinneqaratik.

Naggataatigut uani annertunerusumik oqaaseqarfijissanngilara siunnersuutip imarisai, tassami sorpassuit tungaatigut isumaqatigiikkatta. Kisianni taamaallaat naggataatigut oqaatigissavara soorunami Naalakkersuisuninngaanniit siunertaasimanngitsoq akissuteqaat apuutinnginnissaa, Naalakkersuisuninngaanniit pingaartipparput Inatsisartut piffissaqarluassasut uagut isumatsinnut isummernissaq.

Kisianni uani oqaatigiinnarsinnaavara susassaqarfiit marlut akornani paatsooqatigiinneq pissutigalugu aatsaat piffissaq kingulleq paasigatsigu uagut suliarisussaallugu. Taava ulloq taanna saqqummerneqartussaagaluarluni ilungersorluta naammarsiarsarisimavarput, taamaammat maanna soorunami nuannaarutigivarput agguataarneqarsimammat. Kisianni Naalakkersuisuninngaanniit pingaartipparput akissuteqaatigut piffissaq sioqquillugu apuunneqartassasut, naak Inatsisartut

Siulittaasuata oqarneratuut pisussaaffeqanngitsugut pinngitsoornata saqqumiissaalluta. Kisianni siunertarivarput taanna tamatigut saqqumiinissaq.

Qujanaq.

Josef Motzfeldt, Inatsisartut Siulittaasuat (IA)

Inatsisartunut ilaasortaq Hansen Enoksen, Siumut.

Hans Enoksen (S)

Qujanaq.

Tassa uani atuarfiit taakkartorneqallatsiarmata Naalakkersuisuminaangiit. Tassa nunaqarfinni atuarfiit arlallit unitsinneqarnikuupput, nalilersueqqissaarnissarooq pissutigalugu. Kisianni tassa nalilersuinerit ukiuni arlalinni kommunit peqatigalugit aammalu sanaartornermi pisortaqarfik peqatigeqqissaarlugu ingerlanneqarnikuupput, pisariaqartitsinerpaallu taakku sallinngortinnejarnikuupput utaqqissunneqarsinnaanngimmata.

Uggornarpoq paasissutissat taakku pissarsiareriikkasi taakku soqtiginagit taamatut aalajangerassi. Taanna nunaqarfimmiunut aamma meejanullu ilungersunartorujussuarmik kinguneqarpoq. Taavalu Naalakkersuisoq maaniinnera iluatsillugu kissaatigilaarusuppara kingullermik oqaluttarfimmi oqaaseqaravit taamanikkut illoqarfinni anginerni sisamani nalinginnaasumik inissialortiternissaq pillugu nunaqarfinni illunut pitsanngorsaanissamut, nammineerlutik illulianut, kiassatinut, igalaanut pitsanngorsaanissamut aningaasaliissutit unitsinneqarnikuummata. Akiumagamma suli akinnginnakku, taanna papiaranngorlugu assut pissarsiarerusukkaluarpara.

Josef Motzfeldt, Inatsisartut Siulittaasuat (IA)

Ineqarnermut, Attaveqarnermut Angallannermullu Naalakkersuisoq Jens B. Frederiksen, Demokraatit.

Jens B. Frederiksen, Ineqarnermut, Attaveqarnermut Angallannermullu Naalakkersuisoq (D)

Aap qujavunga, aamma isumagissavara una apeqquteqaat kingulleet akissuteqaat apuunnissaa ilinnut. Eqqaamasakka naapertorlugit akissuteqaat ataaseq nassiuinneqareernikuovoq ilinnut. Kisianni imaassinggaavoq soorunami taanna allamut tunngasoq, kisianni nunaqarfinni tunngasunut,

atuarfinnut tunngasunut uagut isumaqarpugut soorunami aamma taamaammat taamaaliortugut, peqqinnartuusoq ilaatigut nalilersoqilaassalugit.

Imaanngilaq minnerpaamilluunniit iluatiginngikkipput nalilersuinerit siulliit, kisianni takusinnaasagut naapertorlugit aalajangiinerit ilai sanaartornermi iluani politikkikkut annertuumik aalajangiineq aallaaviusarsimasoq. Soorlu Savissivimmi illut nammineq sanaassat 20-it immikkoortinneqarlutik Savissivimmut. Kisianni nunaqarfinni allani annertuumik tunniussisoqarsimanani, naak pisariaqartitsineq soorunami nunaqarfinni allani aamma piviusuusoq.

Taamaammat Naalakkersuisuninngaanniit aallaqqaataaniit suna tamaat nilersorneqarnissaa taanna kissaatigisimavarput, aamma taamaaliorisimavugut. Kisianni oqarsinnaavugut amerlanerpaat suliassat ingerlateqqiinnarsimagigut. Taavalu aamma aappaagu suliassat ilai aallarteqqittussaapput.

Josef Motzfeldt, Inatsisartut Siulittaasuat (IA)

Siunertaq kusanartoq siunnersuutigineqartutut kommuninut tunniutinnani ataatsimoortumik inatsisisamik suliniuteqaqqullugu Naalakkersuisut peqquneqarnissaannik siunnersuut inatsisartuni amerlanerulluartunik tapserneqarluni ingerlaqqittussatut aalajangerneqareerpoq. Qulequtaq taanna pillugu kingulliulluni oqaaseqartussaq Inatsisartunut ilaasortaq Per Berthelsen, Siumut.

Per Berthelsen (S)

Naalakkersuisup tappikaniinnerani uanga apeqqutigilaaginnarniarlugu iserfigineqareermata, nunaqarfinni atuarfiit iluarsarneqartussat suliarinnittussanik isumaqatigiissuteqarfingeqareersimanersut. Taamaappammi taakkua aningaarsarsiassatik pisussaammatigit taamaalillunilu akitsorsaataassalluni annertuumik. Tamanna erseqqissumik paaserusuppara.

Josef Motzfeldt, Inatsisartut Siulittaasuat (IA)

Naalakkersuisoq.

Jens B. Frederiksen, Ineqarnermut, Attaveqarnermut Angallannermullu Naalakkersuisoq (D) Qujanaq. Tassa nalilersuigatta tamakkua aamma ilaatinneqarput.

Josef Motzfeldt, Inatsisartut Siulittaasuat (IA)

Qujanaq. Taava Inatsisartunut ilaasortaq Per Berthelsen, Siumut.

Per Berthelsen (S)

Taavami qanoq naatsorsuutigisariaqarpa, suna suliassatut isumaqatigiissutigineqartoq suliarinnittussamut isumaqatigiissutigineqarsimasoq. Unitsinneqarpat suliarititsisussaminngaanniit. Taava imaanngilaq taakkua aningaasarsiassaat aamma piginneqarsinnaasut, taanna takorloorsinnaanngilara. Naatsorsuutigivara taakkua akilerneqassasut, taavalu aallartisaasoqaqqissappat taava nutaamik aningaasartuuterpassuarnik pilersitsisoqassaaq suliap taassuma aallarteqqinneranut atatillugu. Tamanna taava tassa qanoq annaasaqaatigissavarput qanorlu matuniarneqassappat.

Josef Motzfeldt, Inatsisartut Siulittaasuat (IA)

Eqqaasitsissutigilaarlara Naalakkersuisoq ilaasortat akisariaqanngilaaluunniit, massakkut inatsisissatut siunnersummik ataatsimoortumik saqqummiussinissaq siunertaralugu Naalakkersuisut sulissuteqaqqullugit inatsisartut aalajangiiffissaq siunnersuut taanna oqaluuseraarpot, tassanilu inatsisartuni amerlanerpaarpaat isumaqataallutik suliassaq ingerlateqqinnissaa isumaqataallutik, suliassaq ingerlateqqinnissaa isumaqataaffigaat.

Tulliuppoq Inatsisartunut ilaasortaq Hans Enoksen, Siumut.

Hans Enoksen (S)

Tassa nunaqarfinni atuarfitt taakku ukiut tulliinut ingerlaqqittussaanerarmagit, kisianni takusinnaavakka finanslovimi siunnersummum ilaanngitsut, taamaammat § 36-inngorlugu apuutissavara. Neriuppunga taakkua ersarissumik oqaatsitit maani uppernarsarlugit akissagit, ukiup tulliani aallartittussat suussanersut. Qujanaq.

Josef Motzfeldt, Inatsisartut Siulittaasuat (IA)

Naalakkersuisoq.

Jens B Frederiksen, Ineqarnermut, Attaveqarnermut Angallannermullu Naalakkersuisoq (D)

Aap, tassa taamaallaat oqaatigisinnaavara una, paasisakka naapertorlugit unitsinnejartut, immaqaluunniit kinguartinneqartut suliassat, taakkua assersuutigalugu atsioqatigiittoqarsimareerpat arlaatigulluunniit taarsiiffiginissamut periarfissaqarsimappat taava suliassat unitsinnejarsimannngillat aamma kinguartinneqarsimannngillat. Ersarittumik oqaatigisinnaavara atuarfimmik ataatsimik tunngatillugu kukkuneq aallaavigalugu suliassaq ingerlareersoq unitsinnejaraluarpoq, kisianni paasigatsigu qanoq pisoqarsimanera ingerlaannaq ingerlateqqipparput akuereqqillugulu.

Josef Motzfeldt, Inatsisartut Siulittaasuat (IA)

Allamik oqaaseqartoqarumanngilaq. Qutsavigaarpus Ineqarnermut, Attaveqarnermut Angallannermullu Naalakkersuisoq Jens B. Frederiksen, Demokraatit.

Oqaatigineqareersutut immikkoortoq 61-mi siunnersuutigineqartoq Ineqarnermut Ataatsimiititaliamit ingerlanneqassaaq. Taannalu aappassaaneerneqarumaarluni novembarip 25-iani.

Tulliullugu oqaluuserisassarput normu 40.